

■ CONVIVENZA

L'atgnadad da Son Silvester

DA BETTINA CADOTSCH*

Il countdown per l'onn nov ha cumenzà. Prest è passads 365 dis, prest è il suleglì da rendì 365 giadas e prest è l'onn 2018 istorgia. L'onn 2019 spetga nus cun novas schanzas, autras sfidas ed ina massa piazza per scriver novas istorgias. Quest pass en l'onn nov faschain nus sa chapescha cun la festa da Son Silvester.

Jau hai fitg gugent Son Silvester. Era sche blers din ch'i saja atgnamain in di sco in auter è quel di per mai fitg spezial. A mai pari che jau viv il di da Silvester a moda bler pli conscianta. Jau guard che jau levia baud, che jau fetschia insatge che ma fa cuntenta e che jau saja engraziaivla per quai che jau hai en mia vita. La saira festivesch jau lura ensem cun mes amis fin ch'i chatscha di. Savens turn jau pir cura che mes bab sesa gia davos maisa cun in café.

Jau schess però che Son Silvester n'è betg mo in di nua ch'i vegn bavi schampagner, mabain er in di che dat la schanza da far ina revista da l'onn. Per exempel sche nus ans imaginain l'onn sco in «magiel transparent» emplenì cun blers differents muments. Uschia pudain nus contemplar cun in pau distanza co



che noss onn è stà. Nus vesain tge che nus avain emprendre, tge che nus avain fatg endretg, tge che nus avain fatg fallà, per tge che nus avain bragi larmas da plaschair e per tge che nus avain bragi larmas da tristezza. Nus vesain ch'igl ha dà dis che nus avain stuì far in effort e dis che nus avain giudi la vita.

Silvester è perquai definitivamain ina pussaivladad ed in mument da realisar che la vita è fitg variada e ch'i na dat betg adina mo bels dis, mabain era trists. Questa entira varietad fa da nus carstgauns cun differentas istorgias, uschia che noss «magiels transparents» èn la fin da l'onn fitg individuals.

Jau sper tuttina ch'i vegnia endament a la plipart dapli bellas regurdientschas che nauschas. Nus umans avain il cletg che noss tscharvè è bun da tegnair endament meglier

bels muments. Uschia pensain nus plitost a bels eveniments enstagl a dis nua che tut è ì sbaglià. Per cas ch'ins vul trair in facit schess jau ch'ins po esser positiv, uschè ditg ch'igl ha dà dapli bels dis durant l'onn.

Silvester n'è però betg mo in di nua che nus pudain guardar enavos, mabain surtut er enavant. Guardar en il futur, en l'onn nov, vesair midadas e finamiras. En quel connex pudain nus era discurre dal guardar en la «culla da vaider». Nus ans pudain imaginar tge che vegn a capitar l'onn 2019, nus pudain far tesas e sperar che noss gronds giavischs gajan en vigur. Ma era qua avain nus tuts differentas ideas. Nus na pudain betg esser segirs co ch'i vegn e nus na savain betg co che noss «magiel transparent» da l'onn 2019 vesa la finala or. Nagin da nus.

Jau hai en mintga cas mirveglias tge ch'il 2019 ma porta e ma legrel da far bainprest viva sin l'onn nov. En quel lieu ma resti mo pli da giavischar a tuts tut il bun per l'onn nov ed ina bella festa da Son Silvester.

* Bettina Cadotsch è creschida si a Savognin. Ella studegia Multimedia Production a la Scuola auta da tecnica e d'economia a Cuira e lavura tar Radio Südschweiz e «suedostschweiz.ch».